

L'ordenament regjonâl

L'ordenament regjonâl in Italie al cjamine come i gjambars, denant daûr. Al à podût presentâsi al Paîs cuntun fregul di implant nome in chel moment che la smuarse centrâl, dute scantinade par vie des cjastronadis e carognadis che e veve fatis, no podeve strenzi ni tignî. Ma al timp de Constituent, mudade cualchi vît e zontât cualchi claut, l'argagn al tornà a funzionâ e i "progjets" di autonomie a restarin turclâts e disvuedâts par ordin che a passavin di une Comission a chê altre. Dopo, ducj si sa cemût che la brucje e lade strucje. Al è bastât che il partît che al veve metût tal mieç de sô bandiere il decentrament dal machinari statâl, al rivàs a cjapâ in man i comants dal machinari stes, parcè che di colp al si ricrodès, al cambiàs pinsîr e al tacàs a cessâ indaûr.

Fintremai che a comandavin chei altris - o ancje chei altris - buine la autonomie; cumò che al comande lui, nuie autonomie!

E reson al à! La autonomie e je la uniche scuele di moralitât politiche, di onestât civiche, di cussience publiche pussibil in Italie. Ma in chel dì che il popul talian, par sô nature amorâl, incussient, usât a siervî e a trufâ sot vie ducj i parons, al rivàs a vê une cussience civîl, une serietât, une ombre di responsabilitât politiche, il guvier - cualsisei guvier - al scugnarès fâ i conts cun lui: nol podarès plui parâlu ator cu lis luianiis risorgjimentâls, nol podarès incjocâlu cui "ideâi" picjâts par aiar tant che musets, nol podarès cuietâlu cu lis cjararis e cu lis promessis. Il talian, parcè che al sa fraudâ dutis lis leçs, parcè che al sa rangjâsi in ducj i berdeis, parcè che al sa fâle in ghigne al agent des tassis, al carbinîr, al finançot, al pulizai, al crôt di jessi il plui svelto di ducj i popui. Ma cheste e je la sveltece dal famei, la furbarie nassude in secui di sclavitût. E cun dute cheste maraveose furbarie, il talian nol cumbine nuie di positîf, nol rive ad ore di alçâ il nivel de sô vite, di gjavâ la cragne di intorsi, di diliberâsi di chês crichis politichis, di chês leghis industriâls, di chês gramulis burocratichis, di chês sanguetis monopolitistichis che lu supin fin inte medole dai vues.

Cussì al va benon pal guvier, indulà che infalibilmentri i santui dai plui grues interès a messedin la paste e i papavars de alte burocrazie la rumiin. Ma se la int, invece di strucâsi il çurviel a studiâ trufis par parâsi des leçs fatis, e scomence e stâ atente a interessâsi cuant che a son di fâ e viodi cemût che e bol la cite fin che e je sul fûc; se il popul, invece di lâ daûr ai marcjadants di bufulis, al impare a cjâlâ dafonts des sôs robutis, se in lûc di pensâ ae redenzion de umanitât - che e je competence dal Parieterno - al pense a disgredeâ chei intrics che al po disgredeâ, a meti in vore chês risorsis che al à in man, a realizâ chei lunariuts che al po realizâ, lassant indaûr i siums

impussibii, misurant i progjets daûr lis fuarcis e daûr i mieçs che al à; in sumis se al impare a fâ di bessôl il so interès in forme costrutive, tal so piçul, dentri i confins dal so paîs e de sô regjon: alore la cussience, la responsabilitât e la serietât si fasin strade, alore e nas une moralitât civiche.

Rome, scuolarie di Culau Machiavelli, nol vûl savê di cheste moralitât che i learès lis mans e par consequence no vûl savê di ordenaments autonomistics.

(josef marchet - "Patrie dal Friûl" 1951)